

Gabú Hpo Lù Dang



Yesuq é Hkyô Mhông-myi Shindâm

Laiká bük - 4

Dang-u : Yesuq é hkyô mhô-myi shindâm pé
Hpuq ká sù : Chúblùt Nóng Làt
 : Chúblùt Ban Htáng
Myíng : Zaiwâ
Saî htoq é bui-nyì : October 2003
Dum saî htoq é bui-nyì : August ,2019

Tittle : Good News, Stories of Jesus, Book 4
Translators : Chumlut Nong Lat
 : Chumlut Ban Htang
Language : Zaiwâ
First Edittion : October 2003
Second Edittion : August ,2019

Laiká Bùk Shî-Má Bo É Dang-U Pé

1. Kyôshi Pé Eq Sêng É Dangké Mhô-Myi 1
Mahteq 13:24-30
2. Kyûdûng É Hkyô Lé Yesuq Mhoq Byî É Hkyô 4
Mahteq 6:9-13
3. Ngá Yhûm Kyo Chang Gi, Ó Yùq? 5
Lukaq 10: 25-37
4. Byùq Byùq É Yùqzo 8
Lukaq 15:11-32
5. Zoshuq Poî Mó Ralhum 12
Lukaq 14: 15-24
6. Shi Byùq Bê Sû Lé Yesuq Lhoq Tui É Hkyô 15
Yohân 11: 1-44
7. Yhûmsîng Yesuq Eq Shóluq Huî Lhûm É Hkyô 20
Lagyo 9:1-31

Hí nghap yû àq

Shí-má bo é mhô-myi shindâm nyhit lhum gi, (NT) mai she htoq yu é pé nghut lhê. Mhô-myi hkyuq lhum gi, Gabú hpo lùdanglaiká bùk mâ é nghut mù, ralhum kúm gi, (Acts of the Apostles) mâ é nghut lhê.

Yesuq gi, ahkui lhê é Isi-raelaq ming gâ é mau myî má, nyi laî lò bê sù nghut é hkyô, núngmòq lé taî kyo lù gù nghut bê. Haú ming gi, Yudaq byù hù pê é yhum mau nghut to kôlhang, Yesuq é pyàt má gi, Rómaq byù hù pé mai, ùp tô é ahkyíng nghut ri. Haú hkûn, Yesuq mai mhoq shit byî é eq zui saî é ge gaú hkyô pé lé, a ô naù dùt mù, yhang lé mâ-non bum é, Yudaq htûng sùwún wuì agang jùm myo myo le, nyi bum akô nghut ri.

Haù mù, yhángmòq gi, Yhang lé yu pyám nau nyi bùm kô é yánmai, Yhang lé chyup yû kô-mû, Rómaq ming zau Punto Pyîlat chyáng àp pyám bêkô nghut ri. Yhang gi, Yesuq lé, tapzîng ralhum má, bàt tap nhâng luî, shî shoq jén sat pyám bê nghut ri.

Nghut kôlhang, Îwa Garai Gasang gi, Yhang lé shi é mai, lhoq toq yù bê nghut mù luî, Yesuq gi, mauhkûng mâ é Îwa Garai Gasâng chyáng dum taû ló bê nghut ri. Hau htâng má, byù myo myo gi, Yesuq lé Garaî é yùqzo têng lhê gâ é eq, Garai mai hkyin yu tô é Meshiaq nghû sù nghut lhê ga, lùmjîng bùm bêkô nghut ri.

Haú bang mâ é ra-am gi, lagyô pé dùt lò bêkô nghut ri. Yesuq gi, haú bang lé, Yhâng é hkyô eq séng luî, hko kyo râ matú le, wuì myhup hkám byi râ matú le, Yhâng é atsam mai èq maú hpo li-mik kúmlhá pé lé tân shit râ matú le, jowò myo myo shut nhang htoq kat bê nghut ri. Mhò-myi je htâng lhum kúm gi, myìng gumhkông dik é lagyo dùt é Tarshu wà mâ é Shóluq ga sù eq séng é hkyô eq Garai mai hkyin yu tô é Meshiaq nghù sù nghut lhê ga, lùmjìng bùm bekô nghut ri.

Kyôshi Pé eq Sêng é Dangké Mhô-myi



Radàm lé, Yesuq, byù hpûng lé mhoqshit byî é hkûn, yu é dangké gi, "Garaî é mîngdán gi, byù rayùq yhâng é yò má, ge é kyôshi sân kat to sù" eq wuí nyi ri. Ra-myìn má lhúnglháng bang yhup myhî tô bùm kô le, gumlau gyè rayùq jé lé luî, súngsô yo é agùng má myòqshi pé lé, lé sân hkyô kat to luî, ló byùq bê nghut ri. Hôwa zô pé gi, yùq kô lò mù, ashi pé le htoq ze lò jáng, myòq gàm pé le rahá za ze htoq lò bekô nghut ri.



Haú hkûn, haú yùq é duì-nhâng zoshâng wuè gi, yhâng chyáng jé lé lo bùm kô-mû, “Yhûmsîng hpó ê! Náng é yò má, ge é kyôshi lé za sân kat tô é nghut lhê wá, haú myòqshi pé gi, hkâ-mai lo é nghut bê lhú?” ga, yhang lé myî bum akô nghut ri. Haú hkûn, haú yùq tâi tâi é gi, “Gumlau gyè hpó rayùq shí lé kut bê nhung” gâ ri. Yhángmòq gi, “Ngá-mòq ê luî, myòq haú pé lé ê nùt htoq pyám byi râ lé, nàng ô nàu râ lhú?” ga, yhang lé myî akô. Yhang dum tâi tâi kat é gi, “Haî a ra shi, súngsô ra-am lé le záng nùt lhôm pyám kó âbe.




Kyôshu nám jé shoq súngsô eq myòqqàm pé rahá za jâng yùq tô nyì shi sháng gàq. Haú hkûn shèq, ngò gi, kyô shu bang lé, myòqqàm pé lé hí nùt htoq yû luî, a ding ding kut ding nhâng mù, myihkyóm má dú kat pyám nhâng râ nghut lhê. Hau htâng, má shèq, súngsô lé gi, shû tsîng yù mù, chyî má kat to nhâng râ nghut lhê”gâ ri.

Yesuq Kyû Dûng É Hkyô Lé Mhoq Byî Ri



Núngmòq gi, kyû dûng é hkûn, gè gùn labyoq kut bang su hkâ kut kó! Yhángmòq gi, byù yùq du jùp wó myâng shoq ga, tarâjong pé má le, hkyô kang pé má le toq yàp to luî, kyû dung râ lé chyitdàp bum akô. Matsîng to keq! Yhángmòq gi, yhángmòq é chyûnghuq wó bekô nghut ri. Nghut kôle, núngmòq gi, kyû dûng é hkûn, yhûmsing é gòk hkaû shut wang ló mû, hkum myhî pyám luî, a myang é, náng îwâ chyáng dung aq.

Ngá Yhûmkyo Chang Gi, Ó Yùq Lhú?



Tarâ sará rayùq gi, yhâng gùng yhang nghut bûn é hkyô lé shit râ matú, Yesuq lé myî kat é gi, “Ngá é yhûmkyo chang gi, ó yùq lhú?” gâ ri. Haú hkûn, Yesuq gi, “Radàm lé, byù rayùq gi, Yerusalem wà mó mai, Yerihkó wà shut gyó e ló le, hkyô má, da-myàq pé eq htûng huî ri. Haú bang gi, yhang lé mèbu hkyut yu pyám byi kô é htoq agó, alùq shoî shî râ su dùt shoq bàt nhuq kômû, hkyô má tô pyâm tô akô. Haú hkyô dông mai, hkyangjong hpó rayùq laî âng ri.



Yhang gi, haú yùq lé myàng jáng, hkyô yàm dông koi laí ló byùq ri. Haû eq rajung za, Lewiq hpó rayùq le, haú hkyô dông laí âng ri. Haú yùq le huí e wú luí, hkyô yàm dông koi laí ló byùq bê nghut ri. Nghut kôlhang, Samariq hpó rayùq gi, haú hkyô dông laí âng ri. Yhang gi, haú yùq lé myàng jáng, yhâng myít nhiklhum má gyai yhang wú shogyo bê nghut ri. Haû mù , yhang gi, haú yùq chyáng huí ê mù, yhâng é dàm pé má, xû eq tsîbyiq wîng shoq gyun byi luí, pánchoq èq htup to byî ri.



Hau htâng, yhang gi, haú yùq lé, yhâng é ji-myang htoq má bún ke luî, bíng yhûm ralhum má shuî ê mù, gon lajáng byi râ matú ngùn htingchap í chap byî to luî, Shí yùq lé gon lajáng byi aq. Ngò dum taû lo é hkûn, nàng shí yùq ahtoq má chung pyâm é ngùn zè bànshoq lé, dum lo xap râ nghut lhê.” ga taî tô ri. Hau htâng, Yesuq gi, “Nàng dông ga jáng, shí bang sum yuq má, hká yùq gi, da-myàq htông hui su é yhûmkyo hpó nghut ri lhú?” ga luî, dang lé lhoq htôm ri. Yudaq tarâ sará gi, “Yhang lé, shogyô yù sù nghut ri.” ga, tû taî ri. Haú hkûn, Yesuq gi, “Nàng le ló mù, haû eq rajung za, kut nyî àq” ga, yhang lé tû taî kat bê nghut ri.

Byùq Byùq É Yùqzo




Radàm lé, kang guq zo bâng èq byù a sòn byî é bang myo myo gi, Yesuq mhoqshit é lé gyô yù râ ga jé lé bum akô. Hparishé pé eq Yudaq tarâ sará Pé mai, “ Shi yùq gi, byù a sòn bang lé lhom hâp yù mù, yhángmòq eq rahá za zô nyi rí!” ga, taî pùt nyi bum akô.

Haû mù, Yesuq gi, a-ô mâ é dangké lé taî ri. “Byù rayùq gi, yùqzo í yùq wó ri. Haû nhik má é tiq sù yùq gi, yhâng wa lé, “Âwâ é I-kun mâ é ngò wó gíng é muì ze lé ahkuî, gàm byi lo aq.” ga, dúng ri. Haû mù, yhang gi, yhangzô nhik tâng lé i-kun zè gàm byî pyám bê nghut ri. Tiq sù yùq gi, yhang wó âng é muì zè lé yu chûng mù, yhûm mai wê é shut númnáng wuì eq ngón zô htoq ló byùq bê.



Yhang gi, wê é mau ra mau shut ló jé luî, yhang wó é ngùn pé lé, ngón hkyô má chyat chung pyám bê nghut ri. Hau htâng, haú mau má mùtmó góng gyó lô bê nghut ri. Yhang le lòq kôm dùt byùq bê nghut mù, zò mut wuì shit hui luî, haú ming mâ é byù rayùq chyáng amû bo zui râ matú ê bê nghut ri. Haú yùq gi, Yudaq byù pé a kâm zuî é jung, wàq rém é hkyâm má yhang lé mú byi bê nghut ri. Yhang gi, zò dê mùt luî, wàq pé zô nyi é wàqzang mâ é nùqjí pé èq wam lhoq gyî ri. Jihtûm má gi, yhâng gùng yhang myìt bûn lò luî, “Ngá wâ é langchyâng pé gi, agùn agó myàng zô lhê. Ngò gi, shí má mùt shit râ í dùt bê! Ngò gi, toq mù, ngá wâ chyáng ló luî, “Âwa ê! Ngò gi, Garai lé le shut bê, nang lé le shut bê nghut lhê.



Ngò gi, ahkuî mai nung zo nghû râ le a gíngdán lo, náng é langchyáng rayùq dông za ngo lé lhom hâp yù laq nghû táí râ.” gâ ri. Hau htâng, yhang gi, toq luî yhâng wâ chyáng taû ló bê nghut ri. Yhang we we má ru nghut ashî le, yhângwa gi, gyai yhang wú shogyo mù yhâng chyáng din ê luî, lîngzing má po to mù, bopuq puq byi bê nghut ri. Yhangzo gi, “Âwa ê! Ngò gi, Garai lé le, nang lé le, shut bê nghut lhê. Ngò gi, ahkuî mai nung zo nghû râ le a gíngdán lo” ga taî ri. Nghut kôlhang, yhângwa gi, duì-nhâng zoshâng wuì lé wùt yù luî, “Hân keq! Reng dik e bu-mè yu lé mù, yhang lé hut byi keq; yhâng é lòqnyhui má le lòqtsung tsung byi luî, yhâng é hkyî má le hkyî-tsung pé tsung byi keq. Xu myum dik shoq tsô tô é nojûng zo lé she lò luî, sat keq; zoshuq poî ralhum kut sháng! Haú u lé, yhangzo ko sù yùq gi, yohtung má nyi tô ashî nghut ri. Yhang dum taû lo le, yhûm nàm jé lo é hkûn, zìng ut bàt myhîng é eq gó nyi é htê lé wó gyô kat bê nghut ri.

Haû mù, yhang gi, duì-nhâng zoshâng rayùq lé wùt yù luí, “Haí jung dùt nyi ri lhú?” ga, myí wú ri. Haû duì-nhâng zoshâng gi, “Nung gu dum taû jé lô mô, náng wa gi, yhang lé wáng wáng zán zán dum wó myang yu é yánmai, xu myum dik é nojông zo sat mù, zoshuq poí kut byí é nghut ri” ga, tu taí ri. Haû jáng yhangzo ko sô yùq gi, lûm gyô nhik-yo naû mô, yhúm hkaû a wang ló é za, mhat nyi byùq ri.

Haû mù, yhângwa gi, htoq ê luí, wang lò râ matú ê chyùq ri. Haú hkûn, yhang gi, “Wú aq, ngò gi, jùn rayùq su náng é matú mú zui bê nghut lhê. Hkâ-nhám le náng amîng pé lé a gyo byi a kut wú é nghut lhê. Nàng ngo lé haí byí wú bê lú? Ngá lazúm wuê eq zoshuq poí ralhum món kún râ matú, bainám radu lháng a byí wú!; Nghut kôlhang, shiwa myhí pé eq zum yàp wún uchyang, náng é sùtzè bànshoq lé, lhoq pân pyám sô dum taû jé lô jáng xu myum dik é nojông zo lé nàng sat byi bu-nhung!” ga, yhângwa lé taû taí ri. Yhângwa gi, “Nga zo ê! Nàng gi, shí-má ngò eq rahá za hkâ-nhám lhang nyi to sô nghut luí, ngò wó é lhúnglháng gi, náng é chyat nghut gû bê. Nghut kôlhang, nung gu gi, shi byùq bê nghut lhê, nghut kôlhang ahkuí yhang dum duì bê nghut ri. Yhang gi, byùq byùq bê sô nghut kôlhang, ahkuí dum wó myang ho yù bê nghut e yánmai, zoshuq poí ralhum kut byi luí, chôm gabú nyi lhê.” gâ ri.

Zoshuq Poî Mó Ralhûm É Mhô-Myi



Yesuq gi, Yudaq byù sùwún hpó rayùq é yhûm má, zoshuq ra-mâ zô nyi ri. Haú hkûn, bíng pé mâ é siboî má zung tô é byù rayùq gi, Yesuq lé, “Garaî é mîngdân mâ é siboî má zùng râ matú gi, hkâ-í yhang maúhpo nghut râ” ga, taî kat ri. Haú hkûn, Yesuq gi, “Byù rayùq gi, byù myo myo lé ji to luî, zoshuq poî mó má lhom byi tso râ dâ nyi ri. Zoshuq poî ahkyíng jé jáng, yhang gi, yhâng duì-nhâng zoshâng, Zoshuq poî jin to bê! nghû, châng taí nhang kat ri. Nghut kôhang, ji to huî é bang gi, rayùq htâng rayùq taí râ wó ho yù kô-mû, he pyâm bum akô nghut ri. Sâng-hî yùq gi, “Ngò, yohtung rahkyang byam wui to mù, ê wú wú râ dùt tô ri.



Ngò, tôngbán é dang pé lé lhom yù byi shi laq” ga, haû duì-nhâng zoshâng lé tâi kat ri. Dum rayùq gi, “Ngò, nohtó ngo zúm byam wui to mù, haú pé lé duì nhang chyam wú râ matú e ló nyi lhê. Ngò, tôngbán é dang pé lé lhom yù byi shi laq” gâ ri. Htâng rayùq nghut jáng, “Ngò, myihâng tô é a myáng shî é yánmai, wó lé râ a dùt nghut ri” ga, lhom tâi ri. Haû duì-nhâng zoshâng gi, taû ló mù, yhâng yhûmsîng hpó lé haú hkyô pé bànshoq ló tâi kyô ri. Yhûmsîng hpó gi, gyô nhik-yo mô, yhâng duì-nhâng zoshâng lé, “Wà hkaû mâ é hkyô mó hkyô zo pé shut myàp htoq ê luî, myùng bang, hkyî gyui bang, lòq hten bang eq myòqjît bang lé, ê shuî lò keq” ga, tâi kat ri.



Razúp nghut jáng, haû duì-nhâng zoshâng gi, “Yhûmsîng ê! Náng amîng dông ban kut bê, nghut kôlhang, zùng jowè mân tô ashî nghut ri” ga tâi ri. Haû ga jáng, yhûmsîng hpó gi, “Wà yàm hkyô mó hkyô zo pé shut htoq ê luî, ngá yhûm byíng râ matú, byù pé lé ê shuî wang lò àq. Ngò tâi le, sâng-hi ji to hui bang mâ é ra yùq lháng, ngá zoshuq poî má wó bo lòm râ a nghut” ga, haû duì-nhâng zoshâng lé tâi kat ri.

Shi Byùq Bê Sû Lé, Yesuq Lhoq Toq Yu É Hkyô



Behtani wà má nyi é Lazaruq ga sù no nyi ri. Bêhtani wà gi, Mariq eq yhâng nhá Mahtaq nhik nyi é wà nghut ri. Yhâng nhâ nhik gi, Yesuq chyáng, “Yhûmsîng ê... náng é chytđàp bui-nùm hpó gi, no nyi ri!” ga, dang pying kat akô. Haú lé wó gyo jáng, Yesuq gi, “Nòhpyo shî gi, Lazaruq shî râ matú a nghut; Garaî é hpungwup shingkang lhoq htoq râ matú dùt bê eq, Garaî yùqzo wàq toq é hui râ matú nghut lhê” gâ ri. Yesuq gi, Mahtaq eq yhanggû nhik lé le, Lazaruq lé le chytđàp ri. Lazaruq no nyi é hkyô lé wó gyo jáng, haú yhang nyi nyi é jowò má í nyí jàt nyi yu ri. Hau htâng, yhang gi, chángzô pé lé, “Ngá-nhúng Yudaq mau shut dum taû ló sháng.” ga, tâi ri. Haú hkûn, chángzô pé gi, “Sarâ ê, hkâ-myháng a myáng shî é hkûn lé za,

haú má nyi é Yudaq byu pé, nang lé sat pyám naù kô é nghut lhê. Nàng haû shut dum ê râ hen tô lhê lùq?” ga, tô taí akô. Yesuq gi, “Nyí gi, hkyíng hkum raxe í hkum bo lhê a nghut kó lhú? Nyí má hkyô sô é sô gi, mingkan shi é maubó é yanmai myoq myàng luí, lengbat râ a nghut. Myín lé hkyô sô é sô kúm gi, maubó lé a wó é yanmai, lengbat lhê.” ga tô taí ri. Yesuq gi, “Ngá-nhông é bui-nùm hpó Lazaruq gi, yhup myhî tô ri; ngò yhang lé ê nhaû toq râ dùt ri.” ga, dum taí ri. Nghut kôlhang, yhángmòq gi, gè gè yhup myî tô lhê gâ é đông myít yu pyâm akô nghut ri. Haû mù, Yesuq yhángmòq lé “Lazaruq gi, shi byùq bê nghut kôlhang, yhang eq rahá ngò a nyi âng tô é lé, ngò gabú lhê. Haû gi, núngmòq lùmjíng râ matú nghut lhê. Yhâng chyáng e ló lo sháng” ga taí kat ri.

Htómaq gi, yhâng luzúm chángzô pé lé, “ngá-nhông lhúnglhang bang gi, Yesuq eq rahá sat pyám hui râ đông châng ê lo sháng” ga taí ri. Yesuq jé é hkûn, Lazaruq le myup pyâm e bui-nyì myi nyí jé bê nghut ri. Behtani wà gi, Yerusalem wà mó mai í déng kô za wê lhê nghut mù luí, Yudaq byù myo myo gi, jé lé kô-mû, Mahtaq eq Mariq nhiktâng é yhanggû é yánmai, iyon yôn tô é hkyô lé myít lhoq tíng byi râ ma-tú, lé kûm wú nyi bum akô nghut ri.



Mahtaq gi, Yesuq jé lé lo é hkyô lé, wó gyo' jáng, yhang eq ê hui râ ga htoq e ló kôlhang, Mariq kúm gi, yhûm má nyi tô ri. Mahtaq gi, “Yhûmsîng ê! Nàng shî-má nyi tô é nghut le gi, ngá gu a shî râ nghut lhê wá. Nghut kôlhang, ahkuî le nàng dúng jáng, Garai nang lé gyo byi râ hkyô lé, ngò sê nyi lhê.” ga taî ri. Yesuq gi, “Nung gu asàk dum duì râ nghut lhê.” ga, yhang lé taî kat ri. Mahtaq gi, “Jihtûm bui-nyì má yhang dum toq lô râ hkyô lé, ngò sê lhê.” ga, tû taî kat ri.

Yesuq gi, yhang lé, “Ngò gi, dum duì nhâng sê eq asàk hkyô nghut nyi lhê. Ngo lé lùmjîng sê ó yùq le, shî kôlhang duì râ nghut lhê. Dui nyi é ten má, ngo lé lùmjîng nyi sê ó yùq nghut le le, hkâ-nhám le shî râ a nghut, nàng haú lé lùmjîng lhê luq?” ga, myî ri. Mahtaq gi, “Yhûmsîng ê! Ngò lùmjîng lhê ô! Nàng gi, mingkan má jé lé lo é Garaî yhangzo, Meshiaq nghut lhê hkyô lé, ngò lùmjîng nyi lhê.” ga, tû taî ri.

Mahtaq gi, haú su ga ban taí é htâng má, yhûm shut taú ló mû, yhang gu Mariq lé tsik za wùt yù luí, “Sarà jé tô ri; Nang lé le myí nyi ri.” ga taí kyô ri. Mariq gi, haú su gâ é lé wó gyo jáng, toq luí Yesuq lé hui râ ma-tú, hân hân e ló ri. Yhang gi, wà hkaû shut a jé wang ló shî é za, Mahtaq eq yhang lé ê huí é jowò má nyi tô ashî nghut ri. Mariq lé nhik chôm títng râ ma-tú, yhúm hkaû má yhang eq rahá nyi tô bum é Yudaq byu pé gi, yhang toq mû, hân hân htoq ló é lé, myàng kô jáng, yhâng htâng shut châng bum akô. Yángmòq gi, yhang lé lùpdùng shut ê mû, ê ngaû nhô ngam pyâm akô nghut ri. Mariq gi, Yesuq nyi tô é shut jé ê luí, yhang lé myang kat jáng, yhâng é hkyí wang wú, hkyíhput htûlùq mû, “Yhûmsîng ê! Nàng shî má nyi tô é nghut le gi, ngá gu a shî shirâ nghut lhê wa.” ga taí ri. Yesuq gi, yhang ngau nyi é lé, myang é eq, yhang eq rahá za lé lo bum é Yudaq byu pé ngau bùm kô é lé ê myang ri. Haû mû, yhâng é nhiklhum má htung luí, yhâng i-myít má jàq jàq wú shogyô byùq bê. Haû mû, yhang gi, “Yhang lé hkâ-má myhup tô akô?” ga, yhángmòq lé myí ri. Yángmòq gi, “Yhûmsîng ê! Châng lé mû, lé wú wú aq” ga, tû taí akô. Yesuq gi, ngau ri. Haû mû, Yudaq byu pé gi, “Lazaruq lé yhang hkâ-í chyt é lé wú wú keq!” ga, taí bum akô. Nghut kôhang, yhángmòq mâ é ram gi, “Yhang gi, myòqjít bang lé dum myàng nhâng bê a nghut lhú? Lazaruq lé le, shi ló bê mai wó dum lhoq toq yù râ lùq?” ga, taí bum akô.

Yesuq gi, i-myit má ra dàm dum wú shogyô byùq luî, hkúmdong má luqgòk èq xaû tô é lùqhkýûng nghut é lùp shut ê luî, “Haú luqgòk lé yu pyám keq.” ga, hkun mó hkyô kat ri. Shi ló bê su é yhângnhá Mahtaq gi, “Yhûmsîng ê! Yhang lé myhup pyâm é myi nyí jé bê, nam byùq berâ nghut lhê.” ga, tâ kat ri. Yesuq gi, Mahtaq lé, “Nàng lùmjîng é nghut le gi, Garaî é atsam lé wó myâng râ nghut lhê nghû luî, ngò, nang lé tâ kyô wú bê nghut lhê lùq?” ga, tâ ri. Yángmòq gi, haû luqgòk lé chôm wàq huî pyám byî akô. Haú hkûn, Yesuq tu wú to uchyang tâ kat é gi, “Îwa ê! Nàng, ngo lé gyo byî é hkyô lé, ngò, jeju bûn nyi lhê.

Nàng gi, ngo lé, hkâ-nhám le gyo byî nyi é hkyô lé, ngò, sê tô lhê. Nghut kôlhang, nàng, ngo lé, nhang kat é hkyô lé shî-má nyi tô bum é byù hpúng lùmjîng kôsháng gàq nghû, ngò, îsu tâ é nghut lhê.” gâ ri. Haú su ga luî, tâ é htâng má, “Lazaruq ê! Htoq lô àq!” ga, htê mó èq wùt kat ri. Haû shî bê sù gi, htoq lô luî, yhâng lòq pé eq hkyî pé má màng baí yùp é pân èq yùp to lù gù htoq lo ri. Yhâng myòqdong má, pánchoq eq baí yùp tô ashî nghut ri. Yesuq gi, “Yhang lé hpyi pyám byi keq, ló byùq sháng gàq.” ga, yángmòq le tâ ri.

Haû Yhûmsîng Yesuq Eq Sholuq Huî É Hkyô



Sholuq gâ é byù rayùq nyi ri. Yhang gi, Yerusalem wà mó mâ é noqkuq hpúng lé, lhoq hpyoq pyám râ matú shi-kùt nyi sù nghut ri. Yhang gi, hkyangjong mó chyáng ê hui luî, Damaskuq wà mâ é Yudaq tarajong pé má tân shit râ matú, sàksé maùsau pé dúng yu chung ri. Yhang gi, haû Yhûmsîng Yesuq é hkyô má châng é bang lé, haú jowò má myang é nghut jáng, myiwe wuì nghut kôle, yùqqè wuì nghut kôle chyup yû luî, Yerusalem wà mó shut, she ló nau nyi sù nghut ri. Sholuq gi, Damaskuq wà shut e ló nyi é hkûn, wà eq chyâng lo nyi u lé, mauhkûng htoq mai yhâng é awui ayàm má, byòdàn tung dùqbó to bê nghut ri.



Haû mû, yhang myigùng má, byìt gyó lèq tô é hkûn, wó gyó kat é htê ralhum gi, “Sholuq ê, Sholuq ê! Nàng, ngo lé, haî mû luî, zing-rî nyi lhê lhú?” gâ ri. Yhang gi, “Yhûmsîng ê! Nàng gi, ó nghut lhê lhú? ga, myî kat ri. Htê haû gi, “Ngò gi, nàng, zing-rî nyi é Yesuq nghut lhê. Nghut kôhang, ahkuî nàng toq mû luî, wà hkaû shut ê àq. Nàng, haî kut râ hkyô, nang lé lhom taî kyo râ nghut lhê” gâ ri.

Sholuq eq rahá za lé lô bang gi, dang rahkun le a taî é za, hkyîng yàp tô bum akô nghut ri. Yhángmòq gi, htê lé wó gyô to kôhang, ó lé le a myàng kó nghut ri. Sholuq kúm gi, myigùng mai toq yàp mû, myòq hpông kat le, haí jung lé le a myang byùq dùt bê nghut ri.

Haû mù, yhángmòq gi, yhang lé lòq mai shê luî, Damaskuq wà shut, jún shuî ló bekô nghut ri. Sholuq gi, sum nyí yhang, haî le a wó myâng dùt byùq luî, haú gyoro má haî le a zo a shuq é nyi byùq ri. Damaskuq wà má Ananiaq gâ é chángzo rayùq nyi é nghut lhê. Yhûmsîng Yesuq yhang lé taî é gi, “Ananiaq ê!” gâ ri. Yhang dum tû é gi, “Yhûmsîng ê! Ngò, shí má nyi tô lhê.” gâ ri. Yhûmsîng gi, yhang lé, “Hen yù mù, hkyô shut dîng ê luî, Yudaq é yhûm má, Tarshu wà mâ é Sholuq ga sû byù rayùq lé ê myî yù àq. Yhang gi, kyûdûng nyî luî, shingrán ralhum má, nàng wang lé lò mù, yhang myòq dum wó myâng râ ma-tú, yhang ahtoq má náng é lòq ke byî é lé yhang myàng râ nghut lhê.” ga, taî kyô ri.

Ananiaq gi', “Yhûmsîng ê, byù shi é hkyô lé le, yhang mai, Yerusalem wà mó má ê nang é byù hpúng lé, kut é gyùq hpo hkyô pé lé le, byù myo myo gi, ngò lé taî kyô wú bekô nghut lhê. Ahkuî le, yhang gi, hkyangjong agyi pê é ahko ahkáng eq, náng myîng lang bang bànshoq lé chyup yû râ matú, Damaskuq wà má jé lé lo é nghut lhê.” ga, taî kyô ri.

Yhûmsîng gi, yhang lé, “Ê àq, haî mù gâ le, ngo lé **dójaú râ matú** eq tûngbaù pé eq hkóhkam pé, Israelaq byu pê chyáng ngá é myìng lé sé shoq dùt râ matú, yhang lé ngò, hkyin yù bê nghut lhê. Ngá é yánmai yhang hpu zo râ hkyô bànshoq lé, ngò yhang, yhang lé tûn shit shirâ nghut lhê.” gâ ri. Haû mù, Ananiaq gi, e ló mù, yhúm hkaû shut wang ê luî, Sholuq é ahtoq má yhâng é lòq lé ke byî ri. Haû mù, yhang taî é gi, “Gu-mang hpó Sholuq ê, nàng, shí shut lé lo é hkyô má, nang lé htoq shit é sù, Yhûmsîng Yesuq yhang ngo lé, lé nhang kat é nghut lhê. Yhang gi, nàng myòq dum myàng râ matú eq, Chyoiyúng Woí-nyí eq byíng râ matú, ngo lé nhang kat é nghut lhê” gâ ri. Ra dá dâm, ngo kyap sù é pé gi, Sholuq e myòq mai gyùt gyó pyám luî, yhang gi, myòq dum wó myâng bê nghut ri.

Haû mù, yhang gi, toq yàp luî, wuì-myhup hkâm yù bê. Yhang zoshuq é htâng má, wum-o le dum byíng bê nghut ri. Sholuq gi, Damaskuq wà má chángzô pé eq rahá, rayòq zo nyi nyi ri. Hau htâng, yhang gi, tarâjong pé shut nyàng za ê mù, Yesuq é hkyô lé hko kyô hi ló bê nghut ri.

Yhang taî é má, “Yhang gi, Garaî é yùqzo nghut lhê.” Ie gâ ri. Yhang lé wó gyô é bang lhúnglháng gi, maú byùq bùm kôluî, “Shí yùq gi, myìng haû, lang bang lé, Yerusalem wà mó má sat pyám pyám kut sù, a nghut kô lhú? Dum, yhang shí má jé lé é gi, yhángmòq lé chyup yû râ eq hkyangjong agyi pê chyáng shuî she ló byi râ dâ lhê, a nghut lhú? ga, myî lhûm akô.

Nghut kôlhang, Sholuq hko kyô é dang gi, atsam jé bo é dông dùt luî, Yesuq gi, Meshiaq ga sù nghut lhê gâ é, yhâng é sàksé pé gi, de za dùt é yánmai, Damaskuq wà má nyi bum é Yudaq byù pé gi, dang a wó tû taî byùq bùm lo kó nghut ri.

